

Bosna i Hercegovina
Federacija BiH
Kanton Sarajevo
n/r Vlada Kantona Sarajevo
n/r Skupština Kantona Sarajevo
n/r Predsjedavajući Skupštine Kantona Sarajevo

ZASTUPNIČKA INICIJATIVA ZA DEKRIMINALIZACIJU I LEGALIZACIJU KANABISA U MEDICINSKE SVRHE

Sedma radna sjednica Skupštine Kantona Sarajevo

Kao samostalni poslanik progresivnih i slobodarskih sugrađanki i sugrađana Kantona Sarajevo i glavnog grada Bosne i Hercegovine iskoristio bih priliku da tri dana prije velikog neslužbenog međunarodnog praznika, a to je Svjetski Dan marihuane, pokrenem inicijativu za legalizovanje i regulisanje medicinske upotrebe ulja kanabisa, kao i za kreiranje i donošenje zakona ili policijske uredbe koja će dekriminalizovati ograničen uzgoj kanabisa za lične potrebe i njegovu konzumaciju u privatnom prostoru ili posebno regulisanim klubovima.

Kao samostalni zastupnik nisam u mogućnosti sam pokrenuti ovu inicijativu na višim nivoima vlasti, stoga bih iskoristio ovu priliku da zamolim i ohrabrim kolege iz ove skupštine, a koji su predstavnici u Domu naroda Federacije BiH, da prenesu ovaj prijedlog, ovaj plam slobode, i na taj nivo, a putem svojih stranačkih kolega i na najviši, tj. državni nivo.

OBRAZLOŽENJE: Ulje kanabisa je važan i ljekovit sastojak koji pomaže oboljelim od mnogih bolesti. Kanabis je legalizovan za medicinsku upotrebu i dekriminalizovan u brojnim naprednim državama Slobodnog svijeta. Nakon što je Vlada Federacije BiH u oktobru prošle godine prihvatila zahtjev za legalizaciju istospolnih brakova obrazlažući tu odluku „kao potrebu koja se mora akceptirati na putu ka EU“ (Premijer F. Novalić), mislim da je, pored bosanskohercegovačke Parade ponosa, logičan i prijeko potreban korak progresa na putu ka EU taj da ova vlada, kao progresivna i liberalna vlada Kantona i grada koji bi kao glavni grad morao biti lokomotiva tog progresa, prihvati ovu inicijativu i poradi na zakonu, mjerama i regulisanju upotrebe kanabisa u medicinske i rekreativne svrhe.

Sarajevo, 17.04.2019. godine

Samostalni zastupnik u Skupštini Kantona Sarajevo

Damir Nikšić

